

Perlu kerjasama tangani banjir

Jangan jadikan isu politik, tuding jari cari salah pemimpin

MERU - Banjir di Meru tidak seharusnya dijadikan sebagai isu politik untuk menuding jari mencari salah sesiapa. Sebaliknya semua pihak perlu bekerjasama mencari penyelesaian dalam mengatasi masalah ini daripada terus berulang.

Ketua Biro Infrastruktur dan Kemudahan Asas Jawatankuasa Kemajuan dan Keselamatan Kampung (JKKK) Kampung Meru, Ahmad Samit berkata, banjir itu adalah bencana alam dan tidak adil jika ia dikaitkan dengan kesilapan dilakukan pemimpin politik tertentu atau kepimpinan tempatan yang ada.

Menurutnya, banyak pihak ketahui bahawa Meru adalah kawasan lembah dan rendah serta kerap dilanda banjir sejak bertahun lalu.

"Apabila hujan lebat dalam tempoh yang panjang, kebanyakan penduduk sedia maklum yang banjir mungkin akan melanda kawasan tertentu di sini dan mereka akan bersiap sedia jika kemungkinan itu menjadi nyata.

"Bukan pemimpin

tempatan tidak berusaha mengatasi masalah itu sebaliknya kerja mendalamkan dan melebarkan sistem saliran dilakukan selain menyelenggara perparitan bermasalah seperti yang dilakukan di Kampung Budiman sebelum ini," katanya ketika turun padang melawat lokasi yang disyaki antara faktor menyumbang kepada banjir, di sini kelmari.

Selain itu, beliau berkata, kejadian banjir juga disyaki ada kaitan dengan kunci air di Jalan Benteng termasuk air laut pasang.

"Situasi itu menyebabkan air di daratan tidak dapat turun ke laut ekoran berlaku pertembungan antara keduanya.

"Ekoran beberapa masalah yang dipercayai mempunyai kaitan dengan faktor itu, air mula bertakung dalam saliran dan melimpah masuk ke kawasan penempatan penduduk termasuk kediaman sehingga menyebabkan banjir," katanya.

Oleh demikian itu, Ahmad Samit berkata, pihak berkuasa diminta mengambil langkah segera bagi menangani masalah ini.



AHMAD SAMIT



Pihak berkuasa digesa menyelenggara saliran di Jalan Khamis dan beberapa kawasan lain yang disyaki penyebab kejadian banjir.